



Sud Bosne i Hercegovine
Суд Босне и Херцеговине

Broj: S1 3 Iž 049231 24 Iž
Sarajevo, 28.08.2024. godine

Sud Bosne i Hercegovine u Sarajevu, u vijeću apelacionog odijeljenja sastavljenom od sudija Zvezdane Antonović kao predsjednice vijeća, Vesne Trifunović i Redžiba Begića kao članova vijeća, odlučujući o žalbi političke organizacije građana NAŠA STRANKA sa sjedištem u Sarajevu ul. Branilaca Sarajeva broj 5 koju zastupa generalni sekretar Ćamil Osmanagić, izjavljenoj protiv zaključka Centralne izborne komisije Bosne i Hercegovine broj: 05-1-07-5-1197/24 od 20.08.2024. godine, o obustavi postupka za utvrđivanje odgovornosti za provođenje preuranjene izborne kampanje, na nejavnoj sjednici, održanoj dana, 28.08.2024. godine, donio je

RJEŠENJE

Žalba se usvaja, poništava zaključak broj 05-1-07-5-1197/24 od 20.08.2024. godine i predmat vraća Centralnoj izbornoj komisiji Bosne i Hercegovine na ponovno provođenje postupka.

Obrazloženje

Zaključkom Centralne izborne komisije Bosne i Hercegovine broj i datum navedeni u uvodu, obustavljen je postupak pokrenut po službenoj dužnosti protiv političke stranke Demokratska fronta-DF radi kršenja odredbe člana 7.1 Izbornog zakona Bosne i Hercegovine.

Protiv zaključka žalbu je blagovremeno podnijela politička organizacija građana NAŠA STRANKA zbog povrede odredbi Izbornog zakona BiH. Nakon analize izjašnjenja političke stranke Demokratska fronta, žalba ističe da je pogrešan zaključak da objave Dennisa Gratz na društvenim mrežama Facebook i Tik Tok ne sadrže političku poruku i promociju političke stranke. Smatraju da sadržaj videa pokazuje promociju programa kandidata Dennisa Gratz za načelnika Opštine Centar jer kod potencijalnih birača stvara dojam prioriteta za sanaciju i to samo na području te opštine. Takođe treba cijeniti da je prva objava bila 18.07.2024. godine što ukazuje da je profil TiK Tok napravljen u toku izbornog procesa i isključivo u svrhu promovisanja politike i programa političke opcije kojoj pripada Dennis Gratz. Imenovani od preuzimanja svog mandat 2022. godine do objave prvog videa nije istako ni jednu objavu u kojoj kritikuje infrastruktrne projekte u bilo kojoj lokalnoj zajednici, da bi iste objavio samo za Opštinu Centar u kojoj je jedna od kandidata za načelnika i to prije zvaničnog početka izborne kampanje. Predlažu da se žalba uvaži i

zaključak ukine i predmet vrati na ponovni postupak ili da se zaključak preinači tako što će se donijeti odluka o nastavku postupka i o odgovornosti za kršenje Izbornog zakona.

U odgovoru na žalbu, Centralna izborna komisija Bosne i Hercegovine predložila je da Sud žalbu odbije kao neosnovanu jer sadržaj objava ne predstavlja izbornu kampanju.

Žalba je osnovana.

Prema stanju u spisu proizlazi da je Centralna izborna komisija Bosne i Hercegovine dana 19.07.2024.godine primila informaciju sa dokazima, političkog subjekta NAŠA STRANKA, ovde žalioca, o video zapisima Dennnsia Gratz zastupnika u predsjedničkom domu Federacije BiH na društvenim mrežama Facebook i TiK Tok što predstavlja preuranjenu izbornu kampanju. Prijava istog sadržaja dostavljena je CiKu i dana 20.07.2024. godine putem emaila malaplaneta.pluton@gmail.com, nakon čega je Centralna izborna komisija BiH donijela odluku o spajanju ova dva predmeta i postupanju po navedenim inicijativama po službenoj dužnosti,

Centralna izborna komisija BiH dostavila je inicijativu na izjašnjenje političkoj stranci Demokratska fronta-DF, te je nakon uvida u dostavljene dokaze videozapise na društvenoj mreži Facebook i Tik Tok, dato izjašnjenje političkog subjekta koje je kao svoje prihvatio i Dennis Gratz, donijela zaključak broj 05-1-07-5-1197/24 od 20.08.2024. godine.

Navedenim zaključkom obustavljen je postupak pokrenut po službenoj dužnosti protiv političke stranke Demokratska fronta-DF radi kršenja odredbi člana 7.1 Izbornog zakona Bosne i Hercegovine. Iz obrazloženja zaključka proizlazi da je zasnovan na utvrđenju da tekst opisa objave od kojih jedan glasi „Navečer ovdje bude svega ili je sve puno pasa lutilica. Neko može zapeti na ovo. Ja neznam da je ovo ikada sanirano još od rata“, ne sadrži političku poruku i promociju političke stranke na društvenim mrežama Facebook i Tik Tok. Ovu promociju je predstavlja ni drugi dostavljeni video zapisi koji prema utvrđenju u zaključku govori o loše uređenim infrastrukturnim projektima u lokalnoj zajednici koje iznosi nosilac izvršne funkcije.

Cijeneci pravilnost pobijanog zaključka Centralne izborne komisije BiH, apelaciono vijeće je utvrdilo da navodi žalbe dovode u sumnju njegovu zakonitost.

Prije svega potrebno je raspraviti šta se podrazumjeva pojam izborne kampanje. Izborni zakon (Sl. glasnik BiH br. 23/01 sa izmjenama) u člana 1.1 a stav 1 tačka 7 izbornu kampanju definiše kao radnje i postupke u periodu od 30 dana prije održavanja izbora koji se završava nastupanjem početka perioda od 24 sata prije otvaranja biračkih mjesta, tokom kojeg politički subjekti na zakonom utvrđen način upoznaju birače i javnost sa svojim programom i kandidatima za predstojeće izbore.

Preuranjena kampanja, prema tački 8 citiranog člana, predstavlja svaki oblik radnji iz kampanje koje preuzima politički subjekt u periodu od raspisivanja izbora do perioda zvaničnog početka izborne kampanje. Dakle, preuranjenu kampanju definiše vremenski period u kome je preduzeta što je u ovom slučaju bitno obilježje postupanja protivno zakonskoj odredbi i osnov za utvrđivanje odgovornosti, dok se pojam izborne kampanje cijeni

prema obilježjima propisanim članom 1.1.a stav 7 Izbornog zakona BiH.

Citirana odredbe obilježja izborne kampanje cijeni prema radnjama i postupcima iz čega proizilazi da se uz ocjenu načina objavljivanja i sadržaja objave kao izvršene radnje, cijene i druge okolnosti koje zbog načina ili primjenjenih metoda postupanju mogu dati karakter izborne kampanje.

U konkrentom slučaju pokrenut je postupak protiv političkog subjekta Demokratska fronta-DF jer je Dennis Gratz zastupnik u Predstavničkom domu Parlamenta Federacije BiH na svojim profilima na društvenim mrežama Facebook i Tik Tok objavio video zapise. Iz video zapisa Centralna izborna komisija je zaključila da je ne sadrži političku poruku, niti promociju političke stranke i da govori o lošim infrastrukturnim projektima u lokalnoj zajednici.

Apelaciono vijeće prihvata zaključak Centralne izborne komisije BiH da objave po svom sadržaju koji je izreklo lice koje je sačinilo video zapise ne promoviše političku partiju. Međutim, Centralna izborna komisija je cijenila samu radnju ali nije cijenila način postupanja iz koga može proizaći politička poruka.

Naime, Dennis Gratz je otvorene naloge na društvenim mrežama naslovio kao „df.centar“ i na nalogu postavio logo političkog subjekta Demokratska fronta. Ovu činjenicu Centralna izborna komisija nije cijenila, a upravo sa ovom činjenicom u suprotnosti je utvrđenje Centralne izborne komisije u pobijanom zaključku da je ukazivanje na lošu infrastrukturnu lokalne zajednice iznio nosilac izvršne funkcije.

Nadalje, video snimci sačinjeni pri obilasku terena koji ukazuju na infrastrukturne probleme i propuste, objavljeni sa logom političkog subjekta, pa je bilo nužno raspraviti da li su ovakvi postupci u vrijeme raspisivanja Lokalnih izbora, imaju političku poruku, a što je propušteno prilikom donošenja pobijanog zaključka.

Iz navedenih razloga apelaciono vijeće je utvrdilo da Centralna izborna komisija BiH donoseći zaključak o obustavi postupka protiv političkog subjekta Demokratska fronta nije pravilno primjenila odredbu člana 1.1 a stav 1 tačka 7 Izbornog zakona, što navode žalbe čini osnovanom.

Obzirom na navedeno, po ocjeni ovog vijeća, žalba je osnovana usljed čega je pobijani zaključak Centralne izborne komisije BiH poništen i primjenom odredbe člana 81 stav 2 Zakona o upravnim sporovima Bosne i Hercegovine (Službeni glasnik BiH, broj 19/02 -74/10), predmet je vraćen na ponovno postupnje radi otklanjanja ptropusta na koje je ukazalo apelaciono vijeće Suda Bosne i Hercegovine.

**PREDSJEDNICA VIJEĆA
S U D I J A
Zvezdana Antonović**